

Regional News Unit AIR Aizawl
Friday, July 19, 2024
Time - 7:30 -7:40Hrs
REGIONAL NEWS BULLETIN

HEADLINES (MORNING)

- **Governor Dr Hari Babu Kambhampati an Sairang leh Vairengte inkar kawngpui pawimawh a rang lama siam thei turin Department pahnih te inkara chinfel thuai a tul a ti.**
- **Union Minister of State for Agriculture and Farmers Welfare Pu Bhagirath Choudhary chuan Selesih a College of Veterinary Sciences & Animal Husbandry a tlawh.**
- **Uttar Pradesh-a Chandigarh Dibrugarh Express rel chesualah mi 2 an thi a, mi 20 in hliam an tuar.**
- **CBI chuan NEET UG paper putru kaihhnawihah AIIMS, Patna-a MBBS zirlai pali an man.**

<><><>

GOVERNOR

Governor Dr Hari Babu Kambhampati an Sairang leh Vairengte inkar kawngpui pawimawh a rang lama siam thei turin Department pahnih te inkara chinfel tur awm te, chin fel tumin theihtawp chhuah a ngai a ni a ti.

Nimin khan Governor hian Raj Bhavan-ah NHIDCL- Regional Office Aizawl hotute chu meeting a neih pui a. He hunah hian NHIDCL ten Mizoram chhunga National Highway siam hna hmun 8 a an neih chungchang an sawifiah a, NHIDCL hotute hian kawngpui pawimawh tak Vairengte – Sairang leh hmun danga hna thawh theih a nih loh chhan te an sawifiah a.

NHIDCL hotuten kawngsiam hna hmun thenkhatah mimal hmalakna leh dodalna avanga a khaihlak thin thu an sawi a. An harsatna lian ber erawh kawng laihna tur ruahman chungchangah sawrkar department pahnih inremsiam theih loh vang a ni an ti.

Hemi chungchangah Governor Dr Hari Babu Kambhampati chuan NHIDCL hnathawk te chu beidawng mai lovin, Mizoram tana hmasawna ruhrel pawimawh hmasa bera chhal theih, NH kawngpui laih zau leh NH Kawngpui siam hna thawh a nih theih nan, an harsatna tawh chu chinfel dan zawng chhonzawm zel turin a chah a. Hmalak chhonzawm dan tur pawh sawipui nghalin, amah pawhin Ministry lamah a theih dana umzui a tum thu a sawi.

Governor chuan NH Kawngpui pawimawh zingah Mizoram tana Nunna Hnar tia chhal theih Vairengte – Sairang kawngpui 4 lane a siam hna a thawh theih loh tawp chu pawh a tih zia a sawi a. He kawngpui hi a tlang rual rualin Mizoramah nitina an khawsakna atan sum senso nasa takin a tlem phah dawn a, bungraw lei man nasa takin a tlem phah bakah Mizoramah hmasawna kawng hrang hrangin a thlen thei dawn a ni a ti.

Chuvangin, hetiang khawpa Kawngpui pawimawh hi a rang lama thawh theih a pawimawh a, Department pahnih te pawh an inkara chinfel tur awm te, chin fel tumin theihtawp an chhuah a ngai a ni a ti.

<><><>

KHAWZAWL

Khawzawl District Land Committee meeting chu an Chairman K Vanlalthiana, DC Khawzawl, kaihhrainain DC Meeting Hall ah nimin khan neih a ni a, Department Office tur ram dilnate leh Land Committee recommendation dilna te en ho a rel fel a ni.

Meeting ah hian Khawzawl DC Pu K Vanlalthiana chuan thusawiin District Land Committee chu District level a committee pawimah tak a ni a ti a, Land committee chu land allotment piah amah District chhunga rambuai chinfel kawngahte, ram kang tur ven kawngahte, sawrkar leh vantlang ram vawnhim kawngah te mawphurhna lian tak a nei a ni, a ti. Pu K Vanlalthiana chuan Khawzawl district chhunga rambuai chu Land Committee te kuta a awm angin Land Committee chuan a chingfel thei ngei tur a ni, a ti a, committee member kalkhawmte chu tanualna nen thawk ho turin a sawm a ni.

Meeting ah hian Sawkar Department hang hrang ten Office hmun tura ram dilna Land Committee a an thente rel a nih bakah, mimal ram atanga Land committee recommendation dilna lutte leh Land lease dilna te thir ho a en fel nghal niin a tul ang a hmalak tura rel nghal a ni.

Meeting ah hian Pu Timothy R Lalhmangaiha, Settlement Officer, Vabeimozachhi Chozah SDO(Sadar) leh concern department hrang hrang aiawhte bakah Khawzawl khawchhunga Village Council aiawhte a tel a ni.

<><><>

AH& VETY

Union Minister of State for Agriculture and Farmers Welfare Pu Bhagirath Choudhary chuan College of Veterinary Sciences & Animal Husbandry (CVSc& AH), Central Agricultural University (CAU), Selesih-a Teaching Veterinary Clinical Complex leh Department of Veterinary Microbiology a tlawh a. Nimin khan College-in an sak thar Sales Booth leh Silver Jubilee Monument-te a hawng a, College Community Hall-a exhibition buatsaih a tlawh bakah loneitute leh ran vulhtute nen inkawmhona hun an hmang bawk.

Union Minister of State hian Vety. College-in kum 25 an tlin hriatreng nana lung an phun silver jubilee monument a hawng bawk a. College campus-ah thing a phun hnuah Community Hall-a Exhibition buatsaih chu tlawhin a enfiah a, he hmunah hian Prof. Lalnuntluangi Hmar, Dean, College of Veterinary Sciences & Animal Husbandry kaihhruiin loneitute leh ran vulhtute nen inkawmhona hun hlawkthlak tak neih chhunzawm a ni.

Pu Bhagirath Choudhary chuan loneitute leh ran vulhtute chu ngaih pawimawh tur an nih thu leh kum 2029 ah chuan an thla tin lak luh hi a let 4-a pung tura hmalakna kalpui mek a nih thu a sawi a. An thlai leh sa tharchhuahte a hralhna lam kan ngaipawimawh tur a ni a, FPO hi thu mai ni lovin atakin kan kalpui tur a ni, a ti bawk.

Union Minister of State for Agriculture & Farmers Welfare Pu Bhagirath Choudhary hian program pawimawh hrang hrangte a hman zawh fel hnuah vawiin chawhnu hian New Delhi-ah a kir leh dawn a ni.

<><><>

MAMIT

Mamit District Mizoram Journalist Assn leh Mamit District Superintendent of Police Pi Lalhangpuii Pulamte te chuan Darlak leh Tuidam inkar kawng harsatna sawiin nimin khan an inkawm a.

MJA leh SP te chuan, Darlak leh Tuidam inkar kawng chhiat vanga, mihring leh lirthei te him na tura lirthei tlan dan tur ruahmanna a siam chuan zawm a hlauh tawk lo niin MJA te chuan an hria a, thupek zawm anih ngei theih nan hmalak dan tur an sawiho.

Tuna lirthei kal dan tur ruahmanna siam zing dar 5:00 atangachawhnu lam dar 2:00 thleng Tuidam atanga Darlak pan a kal tur leh tlai lam dar 3:00 atanga zing lam dar 4:00 a Darlak atanga Tuidam pan tura thuchhuah chuan zawm a hlauh lovin, kawng lakah harsatna a thlen nasa hle a. Hei hi tih ziaawm anih theih nan duty detailment siam turin Mamit SP hi an ngen a ni.

SP Mamit chuan, he harsatna hi an hriat thu leh tukin dar 5:00 atanga duty an dah thu a lo hrilh a. Tuna an kawng hawn hian awmzia a nei tam lo anih chuan ruahmanna dang siam leh theih anih thu sawiin, thurawn inpek tawn zel nise an ti a. A tul anih chuan one way a kaltir pawh a ni maithei a ti.

Kan corr sawi danin, he kawng hi Langkaih balu phurhna kawng ber anih vangin fimkhur a ngai hle a. Thupek chhuah hian duty awm loh vanga zawm a hlauh loh vang hian khualzin tan harsatna a thlen nasa hle tih Mamit District MJA te chuan an sawi ani.

<><><>

HEALTHY LUNGLEI

Healthy Lunglei District buatsaihin Lunglei SP Conference Hall-ah Lunglei District Executive Force (DEF) te pualin natna inkai chhawn theih loh chi chungchang inzirtirna nimin khan buatsaih niin, police personnel-te chu an hriselna dinhmun endiksak an ni.

He hun hi Lunglei District Additional Superintendent of Police Pu K. Beihmataosa chuan a kaihruai a. Lunglei SP Pu J. Lalmuankima chuan Healthy Lunglei District-in chuti ang hun an buatsaihsak chu District Police te tan thil lawmawm tak a ni a ti a, nitin nunphung, an khawsakphung leh an ei leh in thalo avang te in NCD a neih theih a, police te chu an hnaah an buai hle thin avangin, mahni inenkawl uluk a tul leh zual tih a sawi a ni.

Additional Deputy Commissioner & Chairman, Sub-Committee on NCD Awareness Campaign & Screening Drive Lunglei Pu James Miahlung chuan thu sawiin, Healthy Lunglei District Campaign ruahmanna hetu ang hun hi buatsaih a nih thu a sawi a.

Mizoramah NCD natna hrang hrang - cancer, zunthlum, thisen sang, stroke vei kan pung chakin, thihpui pawh kan tam hle tih sawiin, ngaihven ngun a ÷ul hle a ni, a ti a. Ni tin nunphungah hriselna ngaih pawimawh te, taksa inenkawl uluk leh ei leh in chungchanga fimkhur te chu NCD laka him nan a pawimawh tih a sawi.

He hun hmannaah hian Dr Vanlallawma Khiangte, MD, Lunglei Civil Hospital chuan NCD chungchang zirtirin, natna hrang hrang zingah NCD hi India ramah thihna thlentu lian ber a ni, a ti a. A tam zawk chu ruihhlo leh zuk leh hmuam tih ÷hin vang a nih thu sawiin, he'ngah hian fimkhur a ngaih thu leh ei leh in uluk a, taksa sawizawi ÷hin a pawimawh thu a sawi.

He hunah hian Lunglei DEF mi 88 te hriselna dinhmun chu Lunglei Civil Hospital-a thawktute'n an endiksak nghal a ni.

<><><>

UP TRAIN ACCIDENT

Uttar Pradesh-a Chandigarh Dibrugarh Express rel chesualah mi 2 an thi a, mi 20 in hliam an tuar. Thudawn danin rel chetsualna hmun hi Gonda district-a Mankapur station kiang Gonda-Gorakhpur rel kawngah a ni a. Rel hian a kawng zawh sualin rel pindan 23 zinga 21 chuan kawng hi zawh sualin chetsualna hi a thleng ta nia thudawn a nia. Gonda-a rel chetsual dan chhui tur hian high-level inquiry din nghal a ni a. Railway Ministry chuan mitthi chhungte hnenah cheng nuai 10 ve ve pek anih tur thu a puang nghal a. Rel chetsualna hmunah hian NDRF leh SDRF ten chhanchhuah hna an thawk nghal a ni.

<><><>

CBI-NEET UG PAPER LEAKED

CBI chuan NEET UG paper putru kaihnawihah AIIMS, Patna-a MBBS zirlai pali an man. CBI in an mante zinga pathum hi MBBS third year niin pakhat hi second year a ni a. CBI sawidanin heng mi pali te hian NEET paper putrua mawhpurtu Pankaj Singh-an exam hmaa zawhna a lo neih lawk chu an chhan sak nia hriat a ni a. Pankaj Singh-a hian heng NEET UG zawhna te hi misual rual organised gang te kaltlangin a nei niin a sawi a. CBI te chuan MBBS zirlai te hi an laptop te man sakin hostel a an awmna chu tlawhpawh theih loh in an kharsak nghal a ni.

<><><>

MANAS

Union Home Minister Amit Shah-a chuan nimin khan National Narcotics Helpline 'MANAS'-1933 a tlangzarh. MANAS kaltlang hian mipuiten ruihhlo tawlhru an hriatte an hrih thei dawn a, Narcotics Control Bureau te he number kaltlang hian biak pawh theih niin ruihhlo ngawlvei leh nghei duh tan pawh zawhna zawh theih a ni a.

A betu hming leh nihna te thup a ni ang. Union Home Minister ho hian New Delhi-ah Narco-Coordination Center (NCORD) an thukhawm nghal a. Thusawiin Pu Shaha chuan ruihhlo do chu a paiwmawh hle tih sawiin tih tak takna nen do a ngai a ni a ti..

<><><>